

四庫全書

集部

欽定四庫全書

集部

苑洛集卷五

詳校官庶吉士臣李如筠

中書臣劉源溥覆勘

總校官原任中允臣王燕緒

校對官中書臣潘庭筠

謄錄監生臣胡金芝

欽定四庫全書

苑洛集卷五

明 韓邦奇 撰

趙太淑人墓誌銘

太淑人贈中大夫太僕卿直菴趙公之配總督宣大山西
偏保諸鎮軍餉戶部右侍郎秉都察院右僉都御史公之母
也既卒兼公訃聞于上曰臣母荷國厚恩封太淑人今歿
矣文階三品國有常經臣今泣血以請上稽兼公資勞報

以全制遣官諭祭錫繩調庸以營葬事開墳之期郡守身至陳牲奠桂詔相秉冊儀采彬彬於是弔者賂者四方來觀者萬夫塞道四田成蹊識士者父噴噴稱嘆謂太淑人賢謂兼公名德上非濫錫下宜榮有也初兼公近侍遠鎮歟歷兩京太淑人皆從祿養歲壬寅北寇蹂我晉陽欲窺畿甸天子震怒命將薄伐簡兼公督軍餉時太淑人偶感風疾然兵革也義弗得辭冒險又不可恐震驚乃奉歸聞屬弟姪侍湯藥甫歷夏秋而太淑人已報辭堂矣兼公追念二十年來婉愉莊

栗朝夕夔夔忽焉及此悲傷痛恨志不懷生及恩命淳
渥光賁泉壤乃知忠孝兼得揚顯為終其情始少慰云
太淑人姓張氏其先河南項城人曾祖均博通經史鄉
試中式訓導開州遂籍于開今開之士盛于甲科者本
訓導敷教之力也訓導公二子督進士監察御史著舉
人郊縣令郊縣太淑人祖也父勲一鄉善士母陳孺人
以內德稱惟生太淑人性穎慧溫貞精女工通列女傳
大義父母愛甚永氏踵門不輕許曰是兒非有福人弗

能偶也乃擇字直菴公蓋時直菴公父中大夫贈公崇尚義氣鄉閭敬憚故善士結二姓之好云比太淑人歸趙氏贈公及配張淑人皆謝世太淑人恒以不獲事舅姑為歎繼姑樊孺人四子俱幼太淑人委曲承順凡餽紉悉出其手樊大安悅直菴公性嚴急又好賓客倉卒治具豐腴潔備直菴公每督兼公兄弟讀書至分夜太淑人亦不寢直菴公綜理家務日夕勞瘁太淑人譬之曰家頗裕諸子中必有穎拔者興何自苦爾直菴公曰吾

豈憧憧不卽自恤哉凡所以為諸弟也然汝言亦大是
待婢僕以寬雖大失悞未嘗惡聲叱罵禮答姻黨宗戚
每及儀物故內外愛敬之甲申朝廷上兩宮徽號以兼
公給事中封孺人後兼公進位通政迎養京邸直菴公
病太淑人躬進湯藥敬事若年少時直菴公歿痛哭輒
弗止兼公兄弟泣勸則曰我未亡人何能自顧也丙申
大慶覃恩以兼公太僕卿封太淑人兼公撫陝每當出
視事太淑人輒戒之曰汝勿乘怒過鞭撻吏民吾甚懼

此久之秦人皆知兼公之仁出自內教初兼公迎養每歲時稱觴為壽太淑人必曰汝其盡心所事吾母子蒙恩已足矣及兼公晉陽之別倥偬疾病間猶以忠勤勉之且令勿以已為念但云邊事寧當速回耳太淑人既丁趙氏富有顧內政益嚴朝夕弗怠簪珥服用靡事華耀及兩膺大典龍章疊賚命服輝煌而勤懇儉素終始不渝云夫富而無驕賢者所難知足不辱古今誦說太淑人富且貴矣而不忘勤儉至以忠勤勉兼公自謂已

足是豈尋常女德哉世以男子弗能自拔者目為婦人
然則太淑人得不謂之女中丈夫哉太淑人生于成化
癸巳五月十五日卒于嘉靖癸卯九月十八日享年七
十一歲子男三長即兼公諱廷端正德辛巳進士七命
歷今官內治外攘功在國史茲不附書配孫氏屢封淑
人次廷璋官生兼公以其庶讓娶郭氏次廷瓊陰陽典
術娶李氏孫男四長栗國子生次果次木次葉孫女四
一適王三命一適王三重一字孫庚一幼未字曾孫女

一幼未字以嘉靖二十四年正月八日啓直菴公龍河
新阡之兆合葬焉前給事中今某官主事傅君學禮兼
公舊僚也以狀來問銘銘曰於太淑人維閨之秀靜女
閒閒君子是姑治爾宮事柔嘉有儀廟祀斯嚴百福來
茲於太淑人維女之英豈曰婦德君子之行孰富而儉
孰貴而勤惟我知足誨子忠仁子德孔那撫我秦中內
修外攘既奏膚功子德令昭萬夫之望維國楨幹太淑
人慶穹碑峩峩蟠螭走鼃煌煌宸翰玉鑿瑣磨昔也不

遑其苦如苓今茲恩榮始慰子心惟開有支坦坦而來
其平如掌中藏乳胎吉匪四獸祥豈萬馬元吉百祥惟
有德者溫溫淑德鬱鬱佳城我勒斯銘斯銘稱情

間太安人墓誌銘

太安人嶧陽隱君子解公之女贈主事間公滋之配戶
部主事仲宇之母也嘉靖十一年十一月二十三日以
疾卒狀云太安人生於某年某月某日距辛享年七十九仲宇將啓贈公之壙而
合葬焉奉狀問銘夫女德之治尚矣間氏代之大家也

間世中哀矣及贈公之身其興也勃然太安人修內之勞也惟太安人靜一其德婉婉其質少而歸焉狀云年十四歸

間宜其家人承贈公之嚴也而委順之終其身無輻脫

也必敬無攸遂也以貞示從也其於翁姑也狀云翁榮壽公姑楊

太孺曲養無方焉事生也致哀以禮焉事死也故諸婦

式焉靈神祐焉狀云太安人得奇疾遇異人而愈人以為孝感所致昭孝也濟濟

乎三男之成器而命之愛而教之寬也農春也賈宇也

學得其養而膺其榮狀云庚寅圓丘成以主事君貴推恩封太安人致慈也難

乎二女同居而志不同行也睽次於家人怨其非意而先其勞妯娌懷之分其績刺而體其情小姑愛之怡怡乎以讓以親敦睦也察雞豚而孕字之料核蔬而樹藝之納酒漿而儲備之賓客之供足矣翁夫之好得矣

云狀

翁及贈公俱好賓客嗜飲太安人精於製造善於存蓄蔬果酒肴皆預處之

著理也若夫析

而合焉

狀云翁姑以家口眾大命異產太安人親睦既久不忍析也

族黨之婚喪而資給焉鄉閭之災患而賑恤焉浴而發治命死而安焉

狀云太安人病起沐浴更衣乃就寢

斯丈夫之鮮能而君子之所尚也其

賢矣乎夫男女天地之大義也成於交愛而毀於晨鳴
狀稱閭氏之興太安人之勞也不其然乎信女德之治
尚矣太安人子男三長仲寬娶康氏繼李氏次仲春
娶劉氏繼樊氏次仲守娶丁氏繼冀氏方氏俱封安
人女四長適霍子秀次適汪鰲次適謝治次適知州董
槐孫男七鏗娶黃氏銅娶張氏鈞娶王氏固娶趙氏邦
娶趙氏立娶蔣氏位娶馬氏孫女四適生員宋國卿一
適趙汝翼一適李基一適李三省曾孫五繼先紹先繼

元喜兒保兒曾孫女三莫之期嘉靖十二年十月初十
日也銘曰維岱之陽有崇其崗蜿蜒俯馴巒巒蒼蒼橫
形止生太安人之藏子孫繩繩保此無疆

通議大夫兵部左侍郎贈都察院右都御史潘公

墓誌銘

嘉靖戊申七月初五日公卒己酉大宗伯以祭葬請上
曰如制大冢宰以贈官請上曰潘珍准贈都察院右都
御史時朝廷方嚴恤典三品官兼得者鮮以公名德祭

葬贈官均錫云公姓潘氏諱珍字玉卿蘊玉之華也初號曰朴菴氏山有峩峯也故又曰峩峯氏以峯之碧也歸田後故又曰碧峯氏峯有兩也故又曰兩峯氏晚而退以卑牧曰益以拙叟云潘氏之先姬姓周畢公之子季孫食采於潘因為氏後服租傭閩之三山唐廣明間逢辰公者憫時之亂上書闕下亟言時事不報隱于歙之黃墩遷于婺源之桃溪是為桃溪潘氏四世至初公七歲不言一日母携之登樓忽朗吟一絕家人驚異及

長識趣異常大度好施人呼為謫仙云初公生汝翼公
宋紹興進士官至秘校秘校生松年公登第官洪州錄
事叅軍叅軍生宣議公汶汶生奉議公執禮執禮生涇
公紹定間選郡馬郡馬生崇龍公崇龍公生廷璧公淮
西安撫計議值宋亡元興誓不仕守東陵之節教子孫
耕讀廷璧公生克勉公無予以兄子侑公嗣侑公生虎
公虎公生勤才公配張氏生坦公字循理號閒菴敦尚
仁厚鄉稱長者配張氏勤才公及閒菴公皆以公貴贈

通議大夫兵部左侍郎二張皆贈淑人張妣淑人夢五
色烏授于懷公生七歲就外傳勤勉敦朴不類羣兒間
菴封公甚愛之為廣延名師躬督課業甫弱冠充縣附
學生提學歲試愛其文取魁縣士戊午中式壬戌登康
海榜進士授浙江紹興府諸暨縣知縣政務循良不事
苛矯創建預備倉扁其門曰養惠更拓養濟院名其菴
曰先斯新孔子廟程力計工民不知勞以治行徵拜大
理寺左評事初公尹諸暨迎養閒菴封公不肯行報書

曰吾豈能以朝夕盤飧遂舍山林之趣哉汝當務顯揚
亦勿若曾元屑屑於口體也又曰民命至重汝勿誤於
庶獄故諸暨之治膏澤為多云陞左寺副考滿廷尉西
臺政府咸以明敏允克署其實於是間卷封公封如公
官張妣封孺人陞左寺正尋陞山東按察司僉事時劇
寇劉六等流劫東郡公分巡東兗駐兗州整搠民兵護
衛親藩賊猝至城下攻東門不得入乃去大掠曲阜公
奏白徒縣築城而曲阜始寧明年更巡海右都司某多

內援怙勢侵削軍士怨苦公廉訪獲狀按治抵法一道肅然更巡東充再更遼東東寧陞本司副使巡察海道而遼東撫按以公巡東寧稱也奏以副使仍巡東寧吏部報曰有成命矣時沿海衛倉官攢滿待勘吏緣為奸查駁至四五年典衣鬻子有隕身者公為立法不再勘死者厚恤之會丁閭巷封公憂服闋起巡福建海道捕擒劇寇三百餘有白金紵絲之賜括民間私造大船可浮海者買給水寨禁弗得再造而奸源塞矣陞山東按

察使公凡三任山東施澤既久人心信愛稱為潘青天
云陞湖廣右布政使尋轉左時巨瑞差脩承天皇陵供費
甚侈公量司帑所蓄既汰其三之二復分派隣省及取
九江料銀協濟而湖民之困以舒湖賦王祿為重近富
之屬率賂脫顧派取遠貧下邑既剗量不平又多逋欠
公隨地所宜而賦之民皆稱便陞右副都御史巡撫遼
東贊理軍務公築邊牆築城堡濬壕塹清屯田廣積蓄
利器械內修大備明年乞休不許丁張淑人憂服闋改

南京右副都御史提督操江乃教造蜈蚣船及八槳船皆迅速如飛追賊無弗及者擒斬番賊徐勲等獲其番物輸之官尋陞南京兵部右侍郎召入兵部改左適安南請討莫登庸廷議遣將提兵問罪公抗疏言北寇陸梁邊烽屢警宜備北寇以急不可懷之強寇安南遠裔又本陳氏故土黎氏篡之今莫氏復篡之禍亂相仍夷方常事宜先遣使諭以禍福如其欵服則順而撫之降封受職以奠南荒未可遽勤王師廷議以成命既下不

宜撓阻罷公閒住後師至南中凡處一如公言而安南
平於是南臺合章乞還公官不報會遇恩詔公獲致仕
是後大臣撫按多薦起公將大用公而公卒矣公生于
成化丁酉五月二十六日距卒享年七十有二公居常
恂恂不事奇峻及臨大利害則英發堅定確乎不可奪
學務自得不為口耳動止迂怪之習才抱浚明而遇事
慄慄勤勉不敢自暇自忽可謂亂而敬擾而毅愿而恭
矣家食十年餘優游自適即星溪之北建四美亭即

柳溪之南建休休亭約邑老為壽朋會歡娛笑語脫略
城府若無廟廊之貴者鄉後生仰而式之公自筮仕至
里居大臣撫按科道連篇累牘薦者三十餘章或見其
才或見其節或見其學政或見其文章皆極華麗夫當
官而薦是其常也若里居非清德重望冠士倫者不得
與然則公身雖未得大行而道則亨矣公所著舉業有
珍珠集奏稿有愚衷錄省愆錄詩文有兩峯存稿年紀
錄榮樂集三錫錄世業錄凡若干卷藏于家配張淑人

柔嘉閑淑且明知若學士自公歷官中外裨助者多非
特為內式也先三歲卒內行備載慈德錄中公已自為
誌納之廣矣子男二長即鑿鄉貢進士母病則刲股歿
則廬墓娶汪氏次曰鑾補廕國子生娶王氏女一京王
適戴緋孫男榮未聘女二桂英元英未字鑾等將以是
年冬十月啓張淑人之廣合葬焉捧讓溪游公之狀來
問銘銘曰維嘉靖己酉公窆於桃溪之新阡有山負戾
有水之玄騰萬馬於後懷萬寶於前鐫穹碑兮千雲蟠

雙龍兮天章郡侯承命兮駿奔陳犧牲兮明堂賜玄
纁兮璣組奠桂酒兮椒漿於維休哉公之勲績銘弗克
殫著其赫奕有莫慕黎廷議詰兵公獨抗疏謂不宜征
乃奪公官道則愈亨終用公言安南乃平公謂北寇勢
漸桀強宜急為備以振邊疆使遠猷之見售無太原之
殘傷於維那哉公言之昌用之有效違則弗祥赫赫明
明皇祖大訓邊戍戰爭備之宜慎安南限隔僻在一方
彼不為患無倚富強至哉皇言公敢對揚公之忠誠實

昭國是我勒斯銘用告太史豈告太史以式臣子

鄉進士趙子春墓誌銘

嗚呼傷哉吾子春乃遽至是邪子春將屬纊屬其友張
省試子靜曰芳也受學於苑洛先生佩訓茲終身焉必
先生銘我墓芳也將服勤於地下矣子靜以狀來告銘
噫吾尚忍銘吾子春邪吾忍不銘之邪銘之乎吾心割
矣然吾不銘欲將孰銘也嗚呼傷哉吾子春倜儻豪邁
而勑禮教明達聰碩而正節概剛侃強毅而服忍讓文

章彬彬然蔚如也使乎南征之志遂而其浚明之績又可量乎而乃遽至是耶卒之時母且八十而子垂髫此子春惓惓不盡之痛恨也萬人皆涕淚矣嗚呼傷哉子春姓趙氏諱芳字子春別號左輔陝西西安同之朝邑箔子村人也趙氏之先本長安人高祖益避元亂始來箔子村曾祖讓業農弗仕祖謹以國子生歷利津丘縣簿五十致仕百歲乃卒封兵馬指揮鄉士大夫大崇敬之曰趙老先生祖妣陳封孺人老先生豁達有遠識治

利丘聲稱卓然父璜兵馬指揮封文林郎母陳封孺人
有內德京畿多豪右正德中為尤甚文林明敏執法人
甚憚之方以治行進官而文林卒矣子春始學於渭北
趙知郡渭北一見稱之曰之子也眉間數寸瞳子精明
質豐而氣清君子之流歟親愛之有異聞焉正德丙子
苑洛子之家食也子春執羲經而問焉苑洛子授以否
泰二卦子春曰乾與坤消長之間欲整頓耶芳也何德
以堪之間坎離而苑洛子弗答子春曰未濟既濟之相

交其後乎非芳也之急苑洛子奇之曰是可以言進退存亡之道矣遂手著本義詳說二十六卷以授之俾誦習焉嘉靖乙酉領省薦累試春官弗第戊戌又弗第過晉陽謁苑洛子苑洛子曰子今強仕文如子學如子大科弗第天也子春曰寬以居之悠久成物春官之首命也先生嘗特授芳也弗習人也天曷故焉歸將詳服先生之教期驗於來春矣歸之五月而病又二月而篤乃顧其兄荅曰死生常理也母老而弗能事子幼而弗能

教死不瞑目也既而曰母老兄能事之子幼兄能教之
遂卒子春性孝弟事文林陳孺人終身不違顏色事兄
蘭及苴甚恭貧時嘗脫內子之簪珥醫蘭之目而目以
明族人有死無棺槨者於我賓配楊氏一子世瞻娶許
氏二女長安順字謝氏次安貞字徐氏子春生于弘治
己未十月十八日卒於嘉靖十八年十一月二十四日
得年四十嗚呼子春吾見其生也吾見其成也乃吾又
見其死也傷哉蘭苴將於己亥二月七日葬子春於先

塋之次銘曰維沙之苑維渭之陽中有美人如圭如璋
有郁其文有成其行嗟嗟子春士林之望孰富爾有孰
促爾亡天不可問冥冥蒼蒼嗚呼傷哉嗚呼傷哉

中順大夫四川夔州府知府劉公德徵墓誌

銘

德徵余友也別且十三年矣今歲再過定州而德徵已
臥病執余手曰堪兒為我教之茲與君永訣焉余心知
其不起也姑寬慰之出而泣下比余至京師而堪持狀

來問墓銘矣嗚呼傷哉德徵姓劉氏諱文煥別號蘭村
德徵其字也亦字子緯劉氏之先蓋世為山西懷仁人
祖忠應成大同中護衛永樂初調定州衛遂為定州衛
人父傑嫡母黃氏生母王氏以德徵貴傑贈承德郎兵
部主事黃氏王氏贈太安人云德徵生而哲靈蓋六七
歲善為奇對諸奇字輒善省識之中有李溥進士者
蓋稱精鑑一見器異之曰是非尋常兒也以文字之弱
冠進學官弟子提學陳公試其文大賞之曰劉生天下

士也於是劉生聲稱籍甚畿內士無不推先劉生者蓋提學陳公延譽之力也正德丁卯鄉試中式明年登進士第授駕部主事蓋隸大司馬大司馬乃數數對衆稱說主事時朝邑韓邦奇為選部員外郎長安劉公璣為大司徒蓋皆善大家宰相與推薦之曰主事當吏部德徵聞知亟抵員外郎曰天下豈少才文煥何以得此員外郎曰主事賢德徵曰員外郎以主事賢竊恐天下以為員外郎私也員外郎文煥友大司徒文煥戚主事苟

賢奈何天下無知者獨其友與戚知之何也乃推他主
事其後又有辭御史事蓋天子用大家宰議選內外諸
司明習國家事著聲名者充御史冢宰獨責之員外郎
蓋薦四十人皆時俊德徵預焉員外郎意德徵且來辭
避不見德徵窘甚夜排闥入扣牖呼曰文煥今日辭御
史非前日辭吏部意也文煥生未晤而王母死黃母育
成瘞甚矣今老且衰可為御史遠巡耶員外郎矍然起
曰邦奇不知其不便如此事遂寢會黃太安人卒守制

去服闋補客部遷儀部員外郎進客部郎中再調駕部
大司馬每條奏議下諸部未能言郎中盡為之對大司
馬悅之曰若郎中數十輩天下事豈足辦哉蓋諸部自
以能不如郎中而郎中日益親重於大司馬乃擢東昌
府知府時大將軍彬導天子南巡江漢蓋彬日侍帷幄
一切奏白盡從之貴震天下諸所過郡縣賄累巨千長
跪稽首始得免德徵嘆曰文煥守此地乃不能邀還車
駕惠鮮困瘁亦已矣奈何剝下溷禮以媚權貴哉吾不

習是也彬大怒繫置之至揚州有李提督者彬親信之謂德徵曰知府寧不知大將軍尊重今天下第一人可亟圖之不則叵測德徵第張目熟視不為應蓋提督心實是之為白遣之彬怒且未休曰知府不稱東昌乃調夔州夔蜀之僻下郡也蓋多豪家習橫不服租庸健訟又多無情實前後知府率因循待調耳德徵既至乃下令曰不用命者有常刑知府不能行姑息之政也然知府亦不故刻害汝蓋自是無有弗服鮮有無情者矣夔

州稱治又夔及旁郡多貴人往往倚府為奇貨德徵皆不禮之有一貴人射木利益木值可四五十金過索五百金平章司臺憲司皆已許之德徵持不與都御史方列牘議薦且陞晉諸貴人盡害之初德徵官京師時又嘗以直忤要司官有氣力者乘此隙曰知府病矣宜罷然實不病德徵既家食閨門課讀暇則問農灌圃與諸生商確古今有言及時事者輒拂衣起宗族有不足調之彊弗友教之皆習其化感其患處鄉里人以禮然性

頗豪俠有機謀善口辯故人亦不敢犯事黃太安人終身不違顏色以孝聞繩文皆當世名士云乃於嘉靖丁亥九月內疾作至戊子三月壬申卒距其生成化壬寅三月丙戌年四十七配李安人即李進士女也側室竺氏子男堪粹美能文雅重士林娶董氏垣亦聰敏勤學娶李氏皆生員李安人出坍尚孩提秀異常兒竺氏出女二蘭適里人韓永壽桂適定州衛指揮使陳璣孫男柯堪子也将以是年五月三日葬城南蘭家左之原銘

曰何仲默稱德徵書類羲之詩擬杜甫其才甚美學可
達於用雖歷舉時之後彥未能或過也使大其位誠有
可述為權貴所害甚可悼惜今觀駕部之聲東昌之操
夔州之治其所蘊抱亦畧施行矣德徵雖不誕有天年
堪之粹垣之敏堦之秀將必有嗣而興者天匪難諱也

通議大夫大理寺卿龍湫王公墓誌銘

公閑人也性貞廉介直正德初開守不理於多口時適
大明黜陟苑洛韓邦奇為考功員外郎太宰以守治狀

不飾諭考功詢之多士皆如太宰言然考功素知守才
疑之聞公往問焉公當飯客考功故久不起公曰吾當
飯客考功請同飯公曰弗堪供奉考功曰安有戶曹主
事可食者而吏曹員外郎不可食乎乃出一盂糲食二
豆蔬共食之客去考功以開守問公徐曰開之士大夫
皆曰守治開無狀民則皆謂守良守後得不黜考功以
公違衆持公議草具待賓戚獨立佳士也遂定交云公
諱綰字邃伯別號龍湫王氏之先本鳳陽人始祖玉洪

武初避兵于開之別駕里遂為開州人王生福榮福榮
生貴貴生溥陽曲縣丞始封承德郎戶部主事繼贈通
議大夫右副都御史配牛始封安人繼贈淑人生公公
童時莊重不羣少長即知敏學伯右布政每見而喜曰
昌吾宗者此子也弱冠中弘治戊午鄉試春試不第卒
業大學先後所交知浚川王公後渠崔公蒼谷王公無
涯孟公皆海內名士乙丑登進士授戶部主事是歲夏
推恩贈翁及牛淑人皆獲封尋陞本部員外郎署郎中

時權瑾用事羣閥倚勢請託公皆不顧未幾贈翁卒于
官邸公哀毀如不欲生扶柩還葬服闋陞河南衛輝知
府公振舉宿廢屏除積奸公移滿案兩造盈庭從容詳
處皆中情理儒學諸生季必嚴試重行賞罰皆始怨而
終服丙子當鄉試監臨東塘毛公以公有文望辟外薦
錄文多出公手毛公喜曰中州之錄可以式矣特疏薦
曰知府學問深邃可學校憲職丁丑當考績時歲荒歉
撫按以公素得人心留以撫之又二年遷湖廣副使初

衛輝為水陸南北通衢臺省權貴過者連車接軒公惟
庭見一揖耳人固素知公亦不深尤也至湖廣適武廟
賓天羣臣奉皇太后旨迎今上嗣統巨闈谷大用者八
黨之一亦在迎侍中強公長跪公不屈肆行悖侮公脫
冠裂服奔赴王府伏啓王深慰答之而公即棄官歸今
上登極公上疏奏劾大用奸惡辭甚激切凡五上而大
用斥矣尋起復河南鎮寇王鏗橫行河朔間公討平之
總督奏言副使累經戰陳親冒矢石故致克捷癸未陞

山西右叅政時巨寇黃太寶掠殺戮流毒郡邑公擒之當道累疏薦叅政顧改鴈門行太僕卿公乃乞歸疏凡三上始得允銓部覆奏謂公有永樂之操州守朱君喜其名孚表其間曰永樂己丑薦起四川左布政使上蕃芒部讐殺累年公以恩信諭平之會牛淑人疾即具疏乞歸鎮巡僚友懇留弗顧比泊廣都而淑人卒壬辰春起江西甲午陞都察院右副都御史巡撫本省地方以恩詔階通議大夫贈翁牛淑人皆獲贈子行恕廕入

太學公撫江西督逋欠清詞訟禁侈俗理陂塘恤民瘼事關藩臬符驗頗犯衆怒亦舉行之大者上聞乙未擢大理卿大理自正德以來避部院尊要久失然駁之職公力舉行之由是衆情不堪私比者多不便左遷山東叅政蒞任疾作乞休不允部移慰留而疾愈甚疏再具未上而公卒矣公入仕來凡四里居耕田讀書絕不干謁有司曲加敬重其取與進退大節無毫髮苟可以對越神明日用居處蕭蕭如寒士平生雖好為詩文然多

不存稿卒後行恕訪之親友僅得三百餘篇痛兄氏早
亡撫諸孤若子先世所遺產盡以畀之公生于成化丁
酉四月初六日卒于嘉靖丁酉正月十一日享年六十
一歲有司延其主祀于鄉賢祠云配吳淑人繼張繼陳
淑人子男三長行簡先公卒次行恕官生娶張氏次行
果娶李氏俱陳出女四長適生員麻秉直次適趙玉俱
吳出次適生員劉謙貞四未字陳出孫男二長事稼殤
次事穡未聘行恕等葬公於漢宣房宮祖塋之東新阡

之兆銘曰古之君子寧身被窘辱不徇人以非禮之恭
寧違衆孤立不少移乎堅定之守寧窮約終世不苟於
一芥之取正德中如瑾如永成如大用生殺予奪生於
呼吸公卿而下伏謁恐後孰敢與之較禮哉公獨抗而
弗屈雖蒙橫逆而道愈亨矣其在大理也推評參駁無
間大小卒之衆議交口屹然不搖至謫遷而不悔也官
至金紫而卑宮室菲飲食苦節以沒齒焉得不謂之古
之君子哉嗟夫塚纍纍兮名永垂兮太史碑兮汗青之

辭

嘉議大夫貴州按察使雲心于公墓誌銘

公余同年友也精敏絕人余同年三百五十人張榜甫
三日公皆識其字無遺一人故其為士居官聲稱異等
用不盡才時論咸惜云公諱鳌字器之號雲心于氏之
先本揚之儀真人勝國末諱彥成者徙籍于滁洪武初
彥成伯子小乙從戎鎮江衛卒從高祖忠嗣之改編滁
州曾祖父和來省樂其土遂家于滁和生大父椿軒處

士能闕

父闕

號南溪母莊氏成化六年庚寅正月八

日丁亥生公公生而靈異少而穎悟甫十九歲廩于州
庠弘治壬子應天鄉試中式春試弗第卒業太學歷事
刑部留心律例諸生或曰于子學養子而嫁耶將備大
人之事乎公曰書言典常作之師是祖宗創述精意一
代法程也況今日歷事乎非昔國學諸生也正德戊辰
登呂柟榜進士授戶部主事部送大倉銀十數萬給邊
羨餘數百悉籍以付主者嗣部檄主守徐州倉以慎修

聞庚午時太宰以風憲重要宜博選天下知名有効士
充之且以其事密付文選主事韓邦奇兩京部寺及府
佐以下預選者三十餘人公為優薦焉改授廣西道監
察御史公有憂色曰明益之慶可榮而鼎重之勝可懼
也而御史之聲名乃著通歷三載奏最於是南溪翁封
文林郎監察御史莊贈孺人繼母周及室余并封孺人
尋奉勅督長蘆鹽法兼視河道所至剗弊剔蠹風裁自
持時虜賊楊虎等大掠河間諸郡縣勢甚猖獗公適駐

滄賊前驅猝至城下州守遁去人情惶駭莫為守賊登
城譙甚公策賊衆多脅從非得已者服朱衣坐臺中臺
面城邇賊從城上望見公相戒曰毋驚動欽差果相率
詣臺門乞命公諭以無留城中及殺人劫庫自非首惡
並許自新皆懼呼羅拜而去公命吏數輩招降數百人
賊勢孤餘兇就縛後按巡宣大宗屬監軍廝養誘脅大
戶包納而率乾沒公私受蠹公廉知之詭曰是多詐謗
焉有帝胄中貴不自愛重者掩捕十數人治其罪勒限

令償上下肅然莫敢犯踰年代還有武臣獻其妹侍武廟而憑籍寵靈緣為奸利公率衆御史攻之不報抗疏再陳至曰不韋進羨姬而潛易秦春申惑李園而卒傾楚明皇寵祿山而幾危唐亦不報左都御史彭公慎許可獨器公令與張御史淮者詳諸文字會大理寺丞缺員銓部欲擬公公聞之急白彭公言故事官即等當以俸差周御史倫實先于鳌階弗可越彭公嘆曰君可謂虞廷之吏矣丙子陞浙江按察司副使浙為大藩獄訟

繁劇號難理公治之易初孝豐土豪湯毛九等負險拒命積歲不服上命都御史張公津提兵克之公與議協有白金文綺之賜壬午今天子龍飛覃恩臣下南溪翁得與公服色同進金紫既陞山東按察使初余孺人卒繼室宣聖裔孫及使命下公引嫌求改適考察當路有啣公非徇者為非語中遂調貴州公曰吾拊心無怍已矣人言詎損我哉欣然抵家拜先隴登堂稱壽召昆季姻友陳說平生無幾微見顏面乃抵貴貴俗故龐厚又

莫有撓者公甚安之嘗曰得行其志者其貴陽乎乙酉
入覲然公意亦倦游矣遂致仕時年五十有五南溪翁
既八十翁之弟率菴居士亦七十有七皆白首康強歲
時公率弟姪洎子若孫殆數百指拜階下人嘆羨以為
難得公自筮仕至休致一廉自持比歸羸無餘貲已而
貴陽舊僚致前未支俸七十金至付子弟令納紀以贍
生家始日裕乃買田左山上泉之麓構屋其上雜蒔花
木義興杭公淮額之曰上泉莊因自謂泉莊老農且為

莊之十四景各有標題徜徉瞻眺超然有舞雩之意且
曰景外之景標題豈能窮哉寺州時與公游未嘗輒有
造請郡公禮敬焉南溪翁病公侍湯藥如少兒既卒歟
葬虞祥一如古禮比禫則公年亦七十矣與鄉先生為
清平會公自里居雖絕不干謁然不忘拯世之志凡有
可以使民裨治者必告有司傾懷無隱問學務精詩文
不事模擬而能道已所欲言尤究心六書之學平生精
力健甚幾八十燭下猶能作蠅頭楷書衆以為雖耄未

艾也乃丁未冬病胃痛藥不即功以今戊申春二月二十有八日卒于正寢享年七十有九配余孺人繼孔孺人皆先公卒子男九長野亨貢士山東城武知縣奔訃哀痛感疾後公百日卒娶張氏次咸亨先公七年卒娶李氏次光亨大學生先九年卒娶王氏次節亨蚤卒俱余出次貴亨孔出次心亨亦早卒次復亨中亨永亨俱側室沈氏出女四自孔出者適滁州衛指揮同知謝承勲自沈出者一字指揮僉事姚應禎二末字孫男四曰

世材世延郡學生茂而賢克世其家世建世瞻皆幼女
十曾孫男三曰居厚居默居易女二貴亨等卜以十有
一月二十五日葬公左家山隴世材以大叅胡公狀來
問銘銘曰惟涂之陽山有泉莊山高平仰上有鳳翔莊
景奇絕標題靡窮徜徉瞻眺有冠有童昔我冠豸實抱
先憂出持風裁入獻忠猷我竭勤誠世兮我遺時哉後
樂萬景俱宜不忘拯世有拂吾膺吾豈寒蟬嗤彼季陵
公年八十黃髮童顏謂當百齡遽爾貞還公才則豐公

位靡亨斯志斯銘斯銘稱情

中順大夫夔州府知府韓公墓誌銘

弘治戊午予與公應試長安會旅卽蓋蒲多士冠也見其方直樂易心愛重之既聞公登正德癸酉鄉試明年登進士嘉靖戊子再會京師而公已歷官至戶部郎中後拜知夔州府壬辰公高蹈歸乃聞之許判言公善處鄉鄉之縣尹以下無弗善公且言其康強不似老人當獲上壽癸卯則公季子綸持王舉人業狀來問墓銘然

享年已七十一矣公諱坤字子厚號上原姓韓氏世為
華之蒲城雙桂里人高祖志川曾祖林祖銳父宣贈工
部主事母李氏封安人皆以公貴也公生而有殊質穎
敏絕人八歲就學日誦千餘言人皆奇之未弱冠補縣
學生每試輒居上第既登進士授嘉興知縣嘉興為浙
巨縣民衆事劇且當吳越閩楚衝號稱難治公單車之
任約為章程次第而徐理之剗弊修利治為郡邑最時
宸濠稱亂楊儀賓者濠黨也潛穴公境內府守貳疑莫

敢動公毅然發吏捕之生員金燦者父為糧長折價三千餘兩燦禁錮累歲莫能償然力學不怠公悲憐其意釋之後燦登進士為御史初燦既釋懷金幣謝公曰吾為天下惜才非私燦也郤之嘉人為詩歌其廉陞工部主事督臨清閘章聖皇太后自興邸駕經臨清嘉公能錫金牌羊酒勞之今上登寶位推恩宣翁李安人獲封贈焉既而改戶部督催湖廣軍餉會李安人卒守制服閱陞員外郎尋陞郎中公自主事至郎中部尚書皆稱

曰能陞四川夔州府知府夔為蜀僻郡吏治多苟且民習久弊樂寬縱便姑息紀綱弛甚公曰為政如水火火烈易避水弱易溺民已慢矣是上臨之也乃更約束易置府吏以剛克之未朞年治效至不拾遺南川賊勢猖獗兵備張公謀築隄城中隄方五里高三丈人以為必須歲月公計丈任工身自督之五日而成蜀人以為神有神明伯夷之歌然公既方直不隨俗好忤當道意乃解印歸歸則日以讀書教子栽花種竹為樂歲時招延

故人賓客宴笑終日人間事若弗知也優游林下蓋十
餘年卒公生于成化九年十月初五日子時卒于嘉靖
二十二年三月初八日戌時公雅好圖書尤邃易學又
樂與人為善每見里中後學有善即極稱揚晚年尤任
真不矯飾人有過必面諭之改云配原氏封安人有內
德二室陸氏劉氏子男六邦維先公十七年卒娶李氏
繼郭氏邦紀娶孫氏邦績娶屈氏邦緒驛丞娶李氏繼
原氏關氏邦經生員先公七年卒娶武氏邦綸監生娶

孫氏女三改兒字李氏夔兒未字丁兒未字孫男六女
九小釤適生員曹紳四釤字原氏詩娶趙氏繼王氏釤
兒適郭資桂兒未字說娶孫氏繼閼氏諒聘屈氏三釤
字郭氏詔未聘翠兒字孫氏長春未字謨諫俱未聘王佩
蟾桂俱未字曾孫女一香兒未字邦紀等以是年九月
二十九日葬公於光瑩之次銘曰蒲之水水清清思義
君子無忝爾生蒲之原原如砥方直君子視其所復嘉
之政如霖之潤夔之政如霆之震公之才如金之鍊可

革可從因地而見蒲之隴鬱乎葱蒼公之幽堂龍首之
藏

通議大夫都察院右副都御史進階正奉大夫陳

公墓誌銘

公卒訃聞上命禮部遣官諭祭工部營葬事公甥叅知
大夫郗君元洪具狀子詩介子誨來請銘曰公治命也
予好公蓋十五年餘比予督撫山西蓋又三年餘每公
禮公必至予室歲時予亦省公于第蓋自是情歎愈浹

洽然公未嘗一言及私予乃疏薦之朝畧曰都御史璘歷任以來聲名耿耿抱籌邊馭衆之才有謹身務實之行及膺巡撫之任適當多事之時七疏求歸而未得一被人言而即罷可當大任者蓋未及柄用而公卒矣公諱璘字邦瑞號一石山西太原之陽曲人也曾祖福聚祖榮贈知州加贈右副都御史配趙氏贈宜人加贈淑人父智至兩淮都轉運鹽使司同知封右副都御史母商氏初封宜人加封淑人其世德懿行蓋載陳氏家傳

云初商淑人將就蓐天大雷雨生公既浴而霽蓋以是
人知其遠到云公幼聰穎度越與羣兒嬉每曰我蓋官
也爾輩為胥輿羣兒皆用命云當就外傳時轉運翁命
師王公槐受蔡沈尚書盡得其精微槐蓋三晉明經士
云十九歲克府學生少師楊公督學政課諸生見其文
奇之曰陳生俊人也由是陳生聲名籍甚三晉士無
不推先陳生者本少師延譽之力也少師者世所稱遂
菴者也蓋素秉知人之鑑云弘治己酉中鄉試第二刊

文為程式癸丑賜同進士出身第一授太常博士同官者蓋推博士多識典常也乙卯相孝廟享南郊見博士氣宇周旋悅甚面咨何官蓋欲超遷不果錫寶鑑一時縉紳稱榮云三載考績封商淑人為宜人蓋從轉運翁知州時階也戊午拜監察御史勅巡居庸諸關闕者崇崗峻壁天限華夷惟數十里或百餘里稍烏道通城守之固若金湯前後監察蓋率付下吏閱圖貼竟事耳于是御史乃躬歷險阨疏可城守者立將官增戍兵曰勞

一時可為千百年之計者上曰御史言是蓋迄今邊腹
永賴云未幾巡按山東有近貴來山東取礦砂蓋近貴
素多內援又荷上命若御史無若我何御史曰民力竭
矣豈復堪益此邪疏論之礦役竟罷蔡河淤塞河流逆
決民田匯為巨浸而稅尚在民民白之御史御史曰是
可導入漕河者蓋後蔡果入漕粒食乃登云先是孔闕
遭回祿修未完御史度工定期尋乃奏成上遣官立御
製碑文特嘉御史績御史勞資既深寧司轉遷有彝格

御史執法不阿多忤尊貴人尊貴人盡憎嫉之遷浙江
提刑僉事蓋臺官以僉事為淹滯人多為僉事心不平
云僉事至浙摘發興除不異山東時既而又遷陝西苑
馬少卿少卿亦不以苑馬為閒散馬蓋蕃息焉時少師
楊公總制三邊疏薦少卿賢遷布政司叅政蓋督軍餉
於是邊儲大足而民且稱便云遷河南按察使蓋其時
豪猾交納宗室侵越法制及發覺然又依憑城社乃罔
恒獲人皆患苦之按察使下令曰自今敢匿人者連坐

捕獲悉正其罪境內肅然鎮守王太監蓋殘墨特甚然
又正德時也民不堪命按察使面責之而王亦知自戢
云遷右布政轉左布政蓋自此經濟大畧益為著聞乃
遷都御史巡撫湖廣改撫延綏蓋北敵寇邊警報特甚
以都御史抱籌邊才也于是繕城堡利器械足倉廩募
戍兵選將官邊威益震丙子敵人寇邊斬獲甚多武皇
降勅獎勵定靖清平邊牆功成有金幣之錫敵復寇邊
復大斬獲捷聞上嘉都御史能稱賜蟒衣三襲前此都

御史未有者蓋異數云都御史三年天官舉常憲奏上
錫誥推恩及祖且廢嗣入監旋推兵侍蓋公亞有內援
者得之既而以轉運翁及商淑人老累疏乞歸上曰璘
素有才識又曰璘操守清慎已有旨勉留著用心巡撫
地方乃復起視事時總兵柳勇叅將李永定把總許國
卜雲蓋交納中貴人緣為姦利軍心憤怨目為四害都
御史曰凶虐若此坐視之是都御史縱長耶劾罷之三
軍稱快會大將軍彬導天子北巡邊塞駐蹕延綏蓋三

月天子寬仁恭儉惟彬黨橫甚處之難都御史執大體
酌時宜雖彬兇焰竟不害帥臣戴欽恃其權位又彬黨
也敢肆簡傲都御史怒甚蓋手自擊之有逆子既成獄
彬欲活之亦不聽邊人相語為真都御史云乃都御史
又引疾乞歸上亦不許報曰璘素有才譽有疾善自調
理以副委任亦不允蓋未幾而商淑人轉運翁訐先後
至矣公自以前後乞休心本為親乃弟能侍湯藥奉治
命哀痛踰禮幾至滅性疏聞上命工禮二部祭葬如例時

彬又導天子南巡江漢蓋廷議以上郡北邊重鎮天子外巡乃奪公至情固留公候代已而武皇上賓有不好公者蓋疏論公謂都御史宜罷詔從之公竟罷去未幾詔進公階正奉大夫云公才既敏達而性復剛毅茂實敦本崇儉不能為閑條媚悅之態為諸生時教讀提刑司有攘金人為亡金者訟攘金人蓋以二百金賄公公嚴拒不納同事生潛誘取之而亡金者坐誣後亡金者得直事發覺同事生皆坐法公獨不汙登甲時蓋有當

道知公者或謂通名可得吉士官公不通名當彬竊柄
時蓋諸司皆以賂贐彬公不贐賂慷慨任事凡所為蓋
時所深避而不肯為者云公生于成化三年八月十八
日申時卒于嘉靖十七年戊戌十月初七日申時享年
七十有二配閻氏贈淑人繼周氏封淑人生男詩官生
娶郭氏繼張氏女長適太原指揮榮泰次適陝西叅議
御元洪俱封恭人繼雷氏先公卒側室段氏生男論監
生行二娶張氏張氏生男誼府庠生行三娶張氏謨行

五聘秦氏生女適喬永殷官生王氏生男諳行四聘包
氏張氏生男謙行六訓行七俱幼彭氏生女字周元祚
孫男恩女二詩等將以嘉靖十八年閏月 閏日葬于勑
建新塋馬南之原銘曰於惟那哉公才浚明濟濟晉多
士孰不推陳生雍雍顯相天子咨名侃侃監察六郡澄
清得金矢於廉訪銘旌常於節鎮山之東河之南榆之
北憲憲令聞我既持斧孰敢越厥行我既秉鑑孰敢譖
且張我旣杖鉞孰敢侵于之疆公奏膚公折馘滿車天

子曰都若汝予嘉蟒衣熾熾龍襲幣煌煌益之以白金
錫之以龍章崇闕巍巍中華賴之蔡河湯湯斯民戴之
吁嗟乎公哉有庸豐哉勤勤七疏懇乞投簪天子曰佛
往盡乃心公既歸止恬然忘世戊戌孟冬公乃長逝有
司訃聞天子曰噫勑葬佳城隆以諭祭佳城如崗巒巒
蒼蒼萬寶不足以為固四備不足以為祥於惟那哉公
之德千百世其永昌

通議大夫都察院右副都御史張公墓誌銘

正德戊辰余與公同登呂柟榜進士識公於南宮後十
餘年同官於晉陽撫臣當歲薦凡藩臬皆列奏牘而余
與公獨弗與余時致仕將歸公憮然抵余書曰君茲歸
矣文魁退且未能進則弗達將若之何哉余復公曰或
去或不去歸潔其身而已矣公翻然曰我道無怨無尤
餘將付之天也後余起撫晉陽公亦撫朔方未幾皆乞
歸比余起總河道方擬得再晤而公已卒云悲夫公姓
張氏諱文魁字元甫別號字川河南開封府蘭陽縣人

也其先本山東單縣人勝國之李高祖長公者避兵蘭
陽因家焉曾祖宗信贈通議大夫都察院右副都御史
配某氏贈淑人父讓遞運所大使封承德郎刑部主事
贈奉政大夫按察司僉事加贈通議大夫都察院右副
都御史配畢氏封安人贈宜人加贈淑人初弘治辛亥
公方垂髫河決城舉家舟而覆恍有朱衣人掖公泊於
林杪以免弱冠補縣學生正德丁卯鄉試中式戊辰登
進士授刑部陝西司主事時權瑾流毒縉紳衆爭以苛

刻冀自免公獨多平反人皆危之弗恤也既而連丁內外艱服闋赴部冢宰曰是權瑾時執平主事耶陞刑部山東司員外郎平反如主事時陞山西按察司僉事巡冀北道初大同當權倅隨駕經過之後地方官緣為姦利至是巡按張侍御英檄公勘之公按都指揮章傑宋文魁削軍資十四萬褫其職竄巨猾陳萬尚寧於災荒既而督修沿邊險隘身往臨巡嘗遇伏兵於橋頭堡公以護兵直前迫之皆遁去胡中丞鍾薦公才賜帑金十

兩陞布政司左叅議復守冀北首疏宗室聰瀾長史趙
寬太監王哲總兵楊玉數十家之橫罪其黨二百八十
餘人權勢斂跡覈追豪商蘇雷逋稅八萬餘金皇店李
瑞逋課十萬餘金充軍儲又閉大同關王廟以釐請罪
之俗毀藩府聖母祠以絕結緣之妖楊中丞志學俞侍
御集皆謂公宜民之仁足餉之才擊強之威可方古人
云陞陝西行太僕寺少卿大同副總雅重公以鞍馬金
器馳賀於陝公曰吾不以易地易界也卻之陞苑馬寺

卿裁革豪強私買私賣之弊馬政以清勅有廉靖不苟
淵塞有猷之獎陞山西布政司右布政使尋轉山東左
使革堂食裁冗費羨餘月計千餘金別貯以資海道備
倭之用楊太史維聰謂公直諒之心剛方之氣清苦之
操淹貫之學經綸之畧實有人所不可及者云適寧夏
撫臣告缺庭議以公久歷關陝大同陞都察院右副都
御史建節朔方敵三入公指畫方畧捕斬四百餘名顆
捷聞凡三拜白金文綺銀牌之賜陞俸正二品唐吏侍

龍謂公秉度策勲儼然為疆場之鎮夏人管黃門律亦
曰夏州撫臣剛折而柔廢惟公不如不吐得撫臣體云
嘉靖戊戌春虜困夏遊擊於宴官湖公得報自率大眾
援之虜始遁因襲寒感疾力求解任不允會大慶推恩
封通議大夫誥有鎮危立利比於南仲之詞於是信公
某淑人讓公卑淑人皆獲封贈庶一子入監乃有不悅
公者罷公節鉞俾叅知行省政事公力辭以都御史致
仕云既歸杜門謝客鳴琴賦詩時召親故子弟能文者

考德問業終日不倦偶晨興曰何錦衣甲馬者充斥
吾庭耶居數日乃卒云公生於成化己亥九月二十七
日卒於嘉靖二十一年七月十九日享年六十有四訃
聞特遣河南布政司孫左使存諭祭有式揚風紀屢獲
戎功爰念往勞良用悼惜之文兼賜帑金二百兩夫匠
一百名襄葬事節禮備物制也維公聰察沉毅剛直果
斷內行修謹雖隆夏未嘗裸體晏坐盛怒未嘗撫案大
叱嚴於嫉惡見吏之貪汙者如仇讐然服善休休若已

有之陸太史武謂公氣清而貌癯身若不勝衣而中剛有
制至臨大事決大疑確不可移云配許氏繼配王氏俱
贈安人淑人繼配郭氏封淑人子二長九德早卒娶袁
氏以貞節顯次三綱官生娶袁氏三綱將以是年三月
初十日葬公於縣西十五里之白雲山來問銘銘曰都
丕休哉大河之濱混混沌淵篤生偉人侃侃按察為豸
為軼昔彼憑城今成竄黜廉靖不苟淵塞有猷公拜稽
首對揚皇休羨餘是蓋乃去堂餐清苦之操楊太史言

天子命我伐鉞西疆首功四百我伐用張皇三錫命金幣斯承惟公大作益之十朋爰念往勞天子悼惜飾禮備物用光窀穸傳有太史勲有旌常維千百年並視銘章

封刑部河南司主事王公墓誌銘

公蒲善士為養而商也生財而有道行貨而敦義轉輸居積而手不離簡冊志不忘惠澤鄉閭愛之朋儕宗之士大夫崇讓之唐儒有言人固有墨名而儒行者夷論

公世可謂商名而儒行矣斯亦不足以有述乎公卒于
安慶太守君奉狀問銘太守君子貳司寇時友也會推
入本科本科者貫城弼教之間謂之掌三法司事蓋司
寇三士之奇選云公諱瑤字文允號素菴姓王氏山西
蒲州宣化坊人系出龍門後徙榮河元季始祖仲文為
河中府掾配戈孺人洪武初籍于蒲仲文生彥純彥純
生秉信公高祖也曾祖景嚴祖榮壽官父馨號敬齋以
貢士授鄧州訓導陞魯山教諭贈徵仕郎中書舍人配

張氏贈孺人以季子中書某貴云公幼而純雅不與羣兒爭稍長贈公授以孝經四書即領畧大旨贈公累試不第家業中衰公乃肇服賈弘治丙辰贈公之鄧州諸子皆從祿薄弗給公貿易鄧裕襄陝間而資漸豐乙丑贈公遷魯山地產竹木麻漆公取良產治器用中度至今土人式之正德中贈公致仕歸資漸耗費公行貨張掖酒泉間又嘗同諸商依酒泉兵憲陳公赴河西忽傳兵至急趨近堡守者不納衆惶懼失措公從容安置貨

物城下圍列驃馬挽弓抽刀倚城自保陳公行城見之
納入堡問曰敵迫近何爾整肅不亂也公曰等死耳須
竭力拒衛安能俯首待戮陳公壯之公因出布絹犒軍
吏陳公義之隨陳公至酒泉適哈密之變軍將多密約
寇為內應陳公孤危無可與計事者乃召公集諸商誓
曰今我與爾輩寄命於此即有變俱當首禍其為我親
軍公率諸商晝夜披甲胄挾弓刀環衛儼然一裨將矣
陳公盡收反者誅之復貨鹽淮浙蘇湖間往返數年資

乃復豐故贈公張孺人暮年樂享孝養嘉靖壬午贈公
卒公哀毀踰禮築堂奉柩癸未張孺人繼卒公哀毀如
贈公越明年合葬新阡家衆請析公以見金與弟姪獨
取長蘆引數千尋赴長蘆守支未獲孫安人卒太守君
及諸女俱幼公聞訃泣曰瑤三十年勤苦未嘗念妻子
今忽若此誰為撫顧急欲圖歸大名王某故人也為其
戚張商者貸二百金公盡鹽貨付之張商不償遂僑滯
大名有夫死子幼翁姑將賣婦為棺婦泣曰以一棺而子

母翁姑離矣公憐之周以棺婦感激撫子養翁姑終身
不再適忽聞中書君疾革棄負資奔赴至京而中書君
已卒公日夜號泣攜孀孤扶櫬歸蒲以餘資命長子服
賈供二家費辛卯州守請鄉飲固辭始就後再不赴家
有崇公曰瑤家世樹德崇者何也為文訴神崇息明年
太守君以進士授刑部主事公作書以五刑明允勿致
枉抑為戒又明年迎養至京廟祀禮成推恩封承德郎
主事次日趨朝謝恩縉紳榮之為詩文以贈居京六載

與金陵熊公杭州馬公會稽周公張公蔣公胡公南昌
胡公杜公闢西張公都城賈公為九老會命工審象繪
形各藏之家為子孫世講計庚戌太守君有安慶之命
公曰汝今為六縣主一舉動即六縣安危也君奉公抵
家請就養府邸公以久離鄉土欲且盤桓數月君重違
公意辭行公申戒曰吾不憂汝不能振耀官常利用明
作但謂果于自信過激或罔耳君抵安慶甫百日方圖
奉迎而公訃至矣公素強健日南至謁先祖中寒明日

戌刻卒遠近吊者幾千人哭皆盡哀初公天性孝友侍
贈公張孺人曲養無方兄弟衆多公身任其勞內則孫
安人獨為窘悴當衆子大變恐傷親心不使聞知寸絲
尺帛不入私室每念諸兄弟無依雖在京師猶以鹽引
經營以資其用與人交忠信不疑於故舊竭力惓惓雖
僕廝亦令得所云公生于成化甲午八月初十日未時
卒于嘉靖庚戌十一月初七日戌時享年七十有七配
孫安人先公卒別有誌繼孟安人子男三長崇義娶張

氏次崇祖未娶卒季崇古即太守君也娶張氏女五長
適沈江二適張允齡三適閻一鷄四適監生寧瓊早卒
五適庠生劉一直早卒皆孫出孫男三女四以今年仲
冬十八二日葬公于祖塋之次銘曰蒲有美人儒而商
江南塞北飛車航本為養親營四方王氏奕奕家用昌
兵憲孤危無可將我披甲胄事戎行桓桓兵憲謀孔誠
流血滿城逆屍僵有子負才上廟廊西臺凜凜持刑綱
公乃教子慎允明叶勿令五麗含冤傷煌煌龍誥承恩

光衣冠俯伏覲神皇白身誰登天子堂瑤函錦軸陳詩
章九老彬彬真良朋叶佳辰勝境時徜徉審像圖形各
家藏子孫世守思不忘惟公積善有餘慶叶馬鬣鬱鬱
氣葱蒼趾生橫形公之崗千祀萬祀永無疆

苑洛集卷五